

四庫全書

史部

欽定四庫全書

史部

欽定續通志卷三百三十四至
六

中書_臣李米覆勘

總校官原任侍講_臣王燕緒

欽定四庫全書

欽定續通志卷一百三十四

列傳

宋 三十八

楊億

偉紘

晁迥

宗憲

劉筠

薛映

謝泌

孫何

僅

朱台符

戚綸

張去華

師德

樂黃目

柴成務

楊億字大年建州浦城人祖文逸南唐玉山令億將生
文逸夢一道士自稱懷玉山人來謁未幾億生有毛被
體長尺餘經月乃落能言母以小經口授隨即成誦七
歲能屬文對客談論有老成風雍熙初年十一太宗聞
其名詔送闕下試詩賦五篇太宗深加賞異命內侍都
知王仁睿送至中書翌日下制即授秘書省正字特賜
袍笏淳化中詣闕獻文改太常寺奉禮郎仍令讀書秘
閣獻二京賦命試翰林賜進士第遷光祿寺丞屬後苑

賞花曲宴太宗召命賦詩于坐側又上金明池頌太宗
訝有司不時召宰相言舊制未貼職者不預即以億直
集賢院至道初太宗親製九絃琴五絃阮文士奏頌者
衆獨稱億為優二年遷著作佐郎帝知其貧屢有霑賚
嘗命為越王生辰使時公卿表疏多假文於億真宗即
位初超拜左正言詔錢若水脩太宗實錄奏億參預凡
八十卷而億獨草五十六卷書成乞外補就養知處州
真宗稱其才長於史學留不遣固請乃許之任召還拜

左司諫知制誥咸平中西鄙未寧詔近臣議靈州棄守之事億上疏曰朔方地在要荒之外聲教不及元朔中大將軍衛青奮兵掠地列置郡縣今靈州蓋朔方之故墟僻介西鄙數百里間無有水草烽火亭障不相望當其道路不壅饑饉無虞猶足以張大國之威聲為中原之扞蔽自邊境屢驚兇黨猖熾爵賞之而不恭討罰之而無獲資糧扉履所失至多將士丁夫相枕而死以致募商人輸帛入穀償價數倍孤壤築城邊民繹騷國帑

匱乏不能制邊人之命及濟靈武之急數年之間兇黨
逾盛靈武危堞歸然僅存河外五城繼聞陷沒但堅壁
清野坐食糗糧閉壘枕戈苟度朝夕未嘗出一兵馳一
騎敢與之角此靈武之存無益明矣臣以為存有大害
棄有大利昔西漢賈捐之建議棄朱崖當時公卿亦有
異論元帝力排衆說奮乎獨見下詔廢之人頌其德臣
以為類於靈武也必以失地為言即燕薊八州河湟五
郡所失多矣何必此為臣竊惟太祖命姚弋弼領慶州

董遵誨領環州統兵裁五千人悉付以閫外之事士卒
効命疆場晏然朝廷無旰食之憂疆場無羽書之警臣
乞選將臨邊賜給廩賦資以策畧許便宜而行倘寇擾
內屬撓之以勁兵示之以大信懷荒振遠諭以賞格彼
則奔潰衆叛安能與大邦為敵哉若欲謀成廟堂功在
漏刻臣以為彼衆方黠積財猶豐未可以歲月破也景
德初以家貧乞典郡江左詔令知通進銀臺司兼門下
封駁事時以吏部銓主事前宜黃簿王太冲為大理評

事

按宋史職官志吏部分四選尚書侍郎俱有左右選其尚書所掌之左右選吏額主事各一人此稱吏部

銓主事
蓋吏也

億以丞吏之賤不宜任清秩即封詔還未幾太

冲補外俄判史館會脩冊府元龜億與王欽若同總其

事其序次體制皆億所定羣寮分撰篇序詔經億竄定

方用之三年召為翰林學士又同脩國史凡變例多出

億手大中祥符初加兵部員外郎戶部郎中五年以疾

在告遣中使致太醫視之億拜章謝以久疾求解近職

優詔不許億剛介寡合當時文士咸賴其題品或被貶

議者退多怨謗王欽若驟貴億素薄其人欽若銜之屢

挾其失陳彭年方以文史售進忌億名出其右相與毀

訾上素重億皆不惑其說

按東都事畧云章獻后之立也真宗欲得億革制使丁謂

諭旨億難之謂曰大年勉為此不憂不富貴億曰如此富貴亦非所願也乃命陳彭年革制億既頻忤旨而王欽若陳彭年深相競毀億嘗入直夜召見禁中命坐賜茶從容顧問久之出文藁數篋以示億曰卿識朕書蹟乎皆朕自起草未嘗令臣下代作也億惶恐不知所對頓首再拜而出乃知競言得行矣此二事宋史本傳不載但稱欽若彭年毀訾而億有別野在陽翟億母往視真宗不惑其說與事畧異

之因得疾請歸省不待報而行上親織藥劑加金帛以

賜億素體羸至是以病聞請解官授太常少卿分司西
京許就所居養療卹府元龜成進秩秘書監起知汝州
會加上玉皇聖號以為參詳儀制副使知禮儀院判秘
閣太常寺天禧二年拜工部侍郎明年權同知貢舉坐
考較差謬降授秘書監丁內艱屬行郊禮以億典司禮
樂未卒哭起復工部侍郎令視事四年復為翰林學士
受詔注釋御集又兼史館脩撰判館事權景靈宮副使
卒

按東都事畧云億當代冠準革奏請皇太子親政斥
丁謂等姦邪事準既逐億亦憂畏而卒年四十七景

佑元年樞密使王晦叔上其事仁宗嘉歎詔贈禮部尚書
諡曰文有司舉故事非當任二府及事東宮四品無
贈官仁宗曰億為國竭忠有君子之大節可拘以常典乎
宋史本傳不載附識錄其子紘為太

常寺奉禮郎億天性穎悟自幼及終不離翰墨文格雄
健才思敏捷略不凝滯對客談笑揮翰不輟精密有規
裁善細字起草一幅數千言不加點竄而博覽強記尤
長典章制度時多取正喜誨誘後進以成名者甚衆重
交游性耿介尚名節多周給親友故廩祿亦隨而盡無
子以從子紘為後弟偉

偉字子奇幼學于億天禧元年獻頌召試學士院賜進士及第以試秘書省校書郎知衢州龍游縣再補蘄州錄事參軍國子監薦為直講附馬都尉李遵勗守澶州辟僉書鎮寧軍節度判官事遷大理寺丞知河間縣再遷太常博士為集賢校理通判單州會巡檢部卒李素合州卒二百餘人謀殺巡檢使入鼓角門州將不敢出偉挺身往問曰若屬何為而反俱曰將有訴于州非反也偉曰持兵來非反而何若屬皆有父母妻子以一朝

忿而欲魚肉之乎悉令投兵坐籍首惡得十餘人斬之
徙知祥符縣提點開封府界諸縣鎮公事權開封府判
官又判三司開拆司累遷尚書兵部員外郎同脩起居
注偉清慎無治劇才常秉小笏以朝知制誥缺中書以
偉名進仁宗曰此非秉小笏者邪遂命知制誥權諫院
嘗曰諫臣宜陳列大事細故何足論然當時譏其亡補
遷刑部郎中為翰林學士祀明堂遷右司郎中判太常
寺為羣牧使兼侍讀學士進中書舍人卒贈尚書禮部

侍郎

紘字望之以蔭歷官知鄞縣鄞濱海惡少販魚鹽者羣居洲島或掠商人財物入海吏不能禁紘至設方畧使識者質惡少船及歸始給還且戒諭之由是不敢為盜以億文獻賜進士出身通判越州知筠州提點江東刑獄除轉運按察使江東饑紘開義倉賑之吏持不可紘曰義倉為民也稍稽人將殍矣紘御下急常曰不法之人不可貸去之止不利一家爾豈可使郡邑千萬家俱

受害邪聞者望風解去或過期不敢之官與王鼎王綽
號江東三虎坐降知衡州徙越州為荆南轉運使徙福
建不赴知湖州復為江東轉運使官至太常少卿卒紘
性嚴雖家居兒女不敢妄言笑聚書數萬卷手抄事實
名窺豹篇

晁迥字明遠世為澶州清豐人自其父侔始徙家彭門
迥舉進士為大理評事歷知岳州錄事參軍改將作監
丞稍遷殿中丞坐失入囚死罪奪二官復將作丞監徐

發二州稅遷太常丞真宗即位用宰相呂端參知政事

李沆薦擢右正言直史館獻咸平新書五十篇又獻理

樞一篇召試除右司諫知制誥

按東都事畧云呂蒙正舉應賢良方正科以迴

方為諫官乃報罷召試翰林遷右司諫擢知制誥與宋史本傳異

判尚書刑部帝北征

雍王元份留守京師加右諫議大夫為判官進翰林學

士未幾知審官院為明德章豫二園陵禮儀使同修國

史知大中祥符元年貢舉封泰山祀汾陰司太常詳定

儀注累遷尚書工部侍郎使契丹還奏北庭記加史館

修撰知通進銀臺司獻玉清昭應宮頌史成擢刑部侍郎進承旨時朝廷方脩禮文之事詔令多出迴手遷兵部侍郎請分司西京特拜工部尚書集賢院學士判西京留司御史臺賜一子官河南以就養仁宗即位遷禮部尚書居臺六年累請老以太子少保致仕天聖中迴年八十一召宴太清樓免舞蹈迴坐御史中丞之南與宰相同賜御飛白大字進太子少傅後復召對延和殿帝訪以洪範雨暘之應對曰比年變災荐臻此天所以

警陛下願陛下修飭王事以當天心庶幾轉亂而為祥也既而獻斧宸慎刑箴大順審刑無盡燈頌凡五篇及感疾卒年八十四贈太子太保諡文元迴善吐納養生之術通釋老書性樂易寬簡服道履正雖貴勢無所屈歷官臨事未嘗挾情害物真宗數稱其好學長者楊億嘗謂迴所作書命無過褒得代言之體喜質正經史疑義標括字類有以術命語迴曰自然之分天命也樂天不憂知命也推理安常委命也何必逆計未然乎子

宗慤

宗慤字世良

東都事畧作世長

以父蔭為秘書省校書郎屢獻

歌頌召試賜進士及第又除館閣校勘三遷大理寺丞

集賢校理迴領西臺宗慤求便養通判許州仁宗即位

遷殿中丞同修起居注天聖中百官轉對宗慤請減上

供壑閑田擇獄官令監司舉縣令累遷尚書祠部員外

郎知制誥入翰林為學士兼龍圖閣學士權發遣開封

府事辨雪疑獄有能名元昊反闕中久宿師以宗慤安

撫陝西與夏竦議攻守策未還道拜右諫議大夫參知
政事會朝廷以金飾胡床及金抹器賜嘉勒斯賚宗慤
曰仲叔子奚辭邑請繁纓孔子曰不如多與之邑繁纓
諸侯之馬飾猶不可與陪臣況以乘輿之器賜外臣乎
必欲優其禮不若加賜金帛後從帝郊祠感疾數求罷
除資政殿學士給事中數日卒贈工部尚書謚文莊宗
慤性敦厚事父母孝篤於故舊凡任子恩皆先其族人
在翰林一夕草將相互制褒揚訓戒人得所宜嘗密詔

訪邊策陳七事頗施用之

劉筠字子儀大名人舉進士為館陶縣尉

隆平集作館陶縣令

還會

詔知制誥楊億試選人校太清樓書擢筠第一以大理

評事為秘閣校理真宗北巡命知大名府觀察判官事

帝垂意篇籍筠預修圖經及冊府元龜推為精敏車駕

西巡又命筠纂土訓是時四方獻符瑞天子方興禮文

之事筠數上賦頌及冊府元龜成進左正言直史館修

起居注遷左司諫知制誥加史館修撰出知鄧州徙陳

州還糾察在京刑獄知貢舉遷尚書兵部員外郎復請
鄧州未行進翰林學士初筠嘗草丁謂與李迪罷相制
既而謂復留令別草制筠不奉詔乃更召晏殊帝久疾
謂浸擅權筠曰姦人用事安可一日居此請補外以右
諫議大夫知廬州仁宗即位遷給事中復召為翰林學
士踰月拜御史中丞先是三院御史言事皆先白中丞
筠勝臺中御史自言事毋白丞雜知天聖二年貢舉數
以疾告進尚書禮部侍郎樞密直學士知潁州召還復

知貢舉進翰林學士承旨兼龍圖閣直學士同修國史
判尚書都省筠素愛廬江遂築室城中構閣藏前後所
賜書再知廬州卒筠景德以來居文翰之選初為楊億
所識拔後遂與齊名時號楊劉凡三入禁林又三典貢
部以策論升降天下士自筠始性不苟合遇事明達而
其治尚簡嚴一子蚤卒田廬沒官包拯少時頗為筠所
知及拯顯奏其族子為後又請還所沒田廬云

薛映字景陽唐中書令元超八世孫後家于蜀進士及

第授大理評事歷通判綿宋昇州累遷太常丞王化基
薦為監察御史知開封縣太宗召對為江南轉運使改
左正言直昭文館為江淮兩浙茶鹽制置副使改京東
轉運使積遷尚書禮部郎中擢知制誥權判吏部流內
銓兼制置羣牧使司以右諫議大夫知杭州映臨決逢
銳庭無留事轉運使姚鉉移屬州當直司毋得輒斷徒
以上罪映即奏徒流笞杖自有科條苟情狀明白何必
繫獄以累和氣請詔天下凡徒流罪於長吏前對辨無

所異聽遣決之朝廷施用其言遂發鉉納部內女口及
鬻銅器抑取其直又廣市綾羅不輸稅皆得實在杭五
年入知通進銀臺司薰門下封駁事封泰山為東京留
守判官遷給事中勾當三班院出知河南府祀汾陰還
駐驛西京以映有治狀賜御書嘉獎遷尚書工部侍郎
集賢院學士判尚書都省進樞密直學士知昇州建言
州以牛賦民出租牛死租不得蠲帝覽章矍然因令諸
州條奏悉蠲之頃之糾察在京刑獄再判都省歷尚書

左丞知揚州徙并州又徙永興軍拜工部尚書兼御史
中丞仁宗即位遷禮部再為集賢院學士判院事知曹
州分司南京卒贈右僕射謚文恭映好學有文該覽強
記善筆扎章奏尺牘為治嚴明吏不能欺每五鼓冠帶
黎明據案決事雖寒暑無一日異也子耀卿秘閣校理
孫紳直龍圖閣

謝泌字宗源歙州歙人自言晉太傅安二十七世孫少
好學有志操太平興國五年進士解褐大理評事知清

川縣遷著作佐郎端拱初為殿中丞獻所著文召試中書以直史館賜緋時言事者衆詔閣門非涉僥望乃許受之繇是言路稍壅泌抗疏陳其不可且言邊鄙有事民政未乂狂夫之言聖人擇焉苟詰而拒之四聰之明將有所蔽復言國家圖書多失次序唐景龍中嘗分經史子集為四庫望遵復故事遂令直館分典四部以泌知集庫改左正言使嶺南採訪淳化二年久旱復上言時政得失時王禹偁上言請自今庶官候謁宰相並須

朝罷於政事堂樞密使預坐接見將以杜私請詔從之
泌上言曰伏覩明詔不許宰相樞密使見賓客是疑大
臣以私也陛下以聰明寄於輔臣自非接下何以悉知
外事若令都堂候見則庶官請見咨事略無解衣之暇
今陛下囊括宇宙總攬英豪朝廷無巧言之士方面無
姑息之臣柰何疑執政為衰世之事乎太宗覽奏即追
還前詔仍以泌所上表送史館會修正殿頗施采繪泌
復上疏亟命代以丹堊且嘉其忠蓋拜左司諫一日得

對便殿太宗稱其任直敢言泌奏曰陛下從諫如流故臣得以竭誠時羣臣升殿言事者既可其奏得專達於有司泌請自今凡政事送中書機事送樞密金穀送三司覆奏而行從之俄判三司鹽鐵勾院奉詔解送國學舉人黜落既多羣聚喧詬懷覓以伺泌出泌知之潛由他塗入史館數宿不敢出請對自陳太宗問何官騶導嚴肅都人畏避有以臺雜對者即授泌虞部員外郎兼侍御史知雜事上元觀燈泌特預召自是為例轉金部

員外郎充鹽鐵副使頃之改度支副使因郊祀條上軍士賞給之數太宗曰朕惜金帛止備賞賜爾泌因曰今陛下薄於躬御賞賜特優實歷代之所難也俄與王沔同磨勘京朝官知三班通進銀臺司出知湖州再遷主客郎中知虢州真宗初邊人屢寇泌上疏曰雍熙末趙普錄唐姚崇太平十事以獻未幾普復用時稱致治之策無出於此尋普病又遼騎擾邊因循未行今北邊謐寧繼遷請命則可行於今日矣省不急之務削煩苛之

政抑奔競來直言斯皆致太平之術也臣伏覩近詔以不逞之徒所陳述皆閭閻事臣聞古先哲王詢于芻蕘察於邇言者蓋慮視聽之蔽故採此以達物情亦罕行其事也臣又聞輔時佐主建萬世之基立不拔之策者必倚老成之人未聞市井之胥走瀆之吏可當其任也惟陛下察往古用賢致治之道則賢者亦必盡忠竭力以輔成太平之治矣咸平二年徙知同州代還與陳恕同知貢舉復知通進銀臺司加刑部出為兩浙轉運使

累遷太常少卿右諫議大夫判吏部銓大中祥符五年
卒年六十三泌性端直然好方外之學錄其子衍為太
常寺奉禮郎衍將作監主簿衍為太子中舍

孫何字漢公蔡州汝陽人父庸字鼎臣建隆初為河南
簿太平興國六年鴻臚少卿改左贊善大夫歷殿中丞
知龍州卒何十歲識音韻十五能屬文篤學嗜古為文
必本經義在貢籍中甚有聲與丁謂齊名友善時輩號
為孫丁淳化三年舉進士開封府禮部俱首薦及第又

得甲科解褐將作監丞通判陳州召入直史館累遷右
司諫真宗初何獻五議其一請擇儒臣有方畧者統兵
其二請世祿之家肄業太學寒雋之士州郡推薦而禁
投贅自媒者其三請復制舉其四請行鄉飲酒禮其五
請以能授官勿以恩慶例遷帝覽而善之

按東都事畧云唐制郊祀

行慶止進勲陪五代肆赦例遷官秩宋興因之未暇革也何與起居郎耿望言其非制真宗嘉納遂定三年磨勲進秩之法郊禮止加散官勲爵

咸平二年舉入閣故事何次當待制

疏請三部使額還之六卿慎擇戶部尚書一人專掌鹽

鐵使事俾金部郎中員外郎判之又擇本行侍郎二人
分掌度支戶部使事各以本曹郎中員外郎分判之是
冬從幸大名詔訪邊事何䟽曰陛下親幸澶魏天聲一
振敵騎四逃雖鎮定道路已通而德棣烽塵未息此殆
將帥或未得人邊奏或有壅闕鄰境不相救援糗糧須
俟轉輸之所致也將帥者何或恃勇無謀或忌功玩寇
但金城堡不邨人民邊奏者何護塞之臣固祿守位城
池焚劫不以實聞老幼殺傷託言他盜不救援者何緣

邊州縣城壘參錯如輔車唇齒之相依若頭目手足之相衛託稱兵少不出或待奏可乃行俟輦輸者何敵騎往還姦馳鳥逝贏糧景從萬兩方行迫乎我來寇已遁去此四者當今急務擇將帥則莫若文武之內參用謀臣防壅閼則莫若凡奏邊防陞見庭問合救援則莫若督以軍令聽其便宜運糗糧則莫若輕齎疾馳角彼趨捷今所慮存食者惟東北無備之城繕完周防不可不慎且大河津濟處處有之亦望量屯禁兵扼其要害則

請和之使不日可待真宗覽而嘉之及傳潛逗撓無功
何又請斬潛以徇俄權戶部判官出為京東轉運副使
又獻疏請擇州縣守宰省三司冗員遴選法官增秩益
奉未幾徙兩浙轉運使

按東都事畧作京東兩浙轉運使
隆平集作京西兩浙轉運使

加起居舍人景德初代還判太常禮院俄與晁迥陳堯
咨並命知制誥掌三班院何先以被疾勉強親職一日
奏事帝前墜奏牘於地俯取之復墜笏有司劾以失儀
詔釋之何慚上章求改少卿監分司西京養疾帝不許

第賜告是冬卒年四十四帝在澶淵聞之憫惜錄其子

言為大理評事何好學樂名教勤接士類後進之有詞

藝者必為稱揚然性褊急不能容物在浙右專務峻刻

州郡病焉

按東都事畧云何褊急頗事苛察日有撫楚州縣吏患之乃求紙本古碑字磨滅者揭之

館中何至則請其碑辨識文字遂往往至暮不復者錄文案又官屬羅逮罰者甚衆故從者依憑其威妄為寒

暑所至騷然視宋

弟僅

史本傳較詳附識

僅字鄰幾少勤學與何俱有名于時咸平元年進士甲

科兄弟連冠貢籍時人榮之解褐舒州團練推官會詔

舉賢良方正之士趙安仁以僅名聞策入第四等擢光祿寺丞直集賢院俄知浚儀縣歷遷右正言知制誥同知審官院永興孫全照求代真宗思擇循良任之僅嘗倅京府諳民政乃命知永興軍府僅純厚長者為政頗寬嘗詔戒焉大中祥符元年加比部員外郎代還知審刑院累進給事中天禧元年卒年四十九錄其子大理評事和為衛尉寺丞僅性端慤中立無競篤於儒學士大夫推其履尚僅弟侑亦登進士第至殿中丞

朱台符字拱正眉州眉山人士少聰穎十歲能屬辭太宗
廷試貢生多擢敏速者台符與同輩課試以尺晷成一
賦淳化三年進士登甲科解褐將作監丞通判青州召
入直史館遷秘書丞知浚儀縣咸平元年與楊礪李若
拙梁顥同知貢舉俄以京府舊僚擢太常博士出為京
西轉運副使上言頃者晉氏失御中原亂離太祖深鑒
往古酌取中道與民休息遣使往來二十年間大省戍
邊之卒不興出塞之兵深得制禦之道也陛下自天受

命宜於此時脩好契丹彼必懽悅慕義因與之盡捐前
惡復尋舊盟利以貨財許以關市如太祖故事則兩國
既和無北顧之憂可以專力西鄙繼遷自當革心而束
手矣又自請往使時論譴之咸平二年春早詔求直言
台符上疏請重農積穀任將選兵慎擇守令考課黜陟
輕徭節用均賦慎刑責任大臣與圖治道奏入優詔褒
答入為鹽鐵判官改判戶部勾院拜工部員外郎換度
支判官景德初鄭文寶為陝西轉運使或言其張皇生

事命台符代之台符俊爽好謀然頗以刻碑為舉職與楊覃聯事覃頗欲因仍舊貫台符則更革煩擾議事違

戾交相掎奏命御史視其狀徙台符知郢州覃知徐州

按宋史楊覃傳作隨州

三年召還會執政有不喜者復出知洪州

卒於舟次年四十二賜其子公佐同學究出身公佐卒

又以次子壽隆試將作監主簿弟昌符大中祥符中舉

進士為屯田員外郎

戚綸字仲言應天楚邱人父同文自有傳綸少與兄維

以文行知名篤於古學喜談名教太平興國八年舉進士解褐沂水主簿按版籍得逋戶脫口漏租者甚衆徙知大和縣就加大理評事江外民險悍多構訟為諭民詩五十篇因時俗耳目之事以申規誨每歲時必與獄囚約遣歸祀其先皆如期而還遷光祿丞坐鞠獄陳州失實免官久之復授大理評事知永嘉縣境有陂塘之利浚治以備水旱復為光祿寺丞真宗即位轉著作佐郎通判泰州將行秘書監楊徽之薦其文學純謹宜在

館閣命為秘閣校理受詔考校司天臺職官定州縣職田條制詔館閣官以舊文獻帝嘉綸所著特改太常丞俄判鼓司登聞院出內府緡帛市邊糧詔綸乘傳往均市之景德元年判三司開拆改鹽鐵判官上疏言邊事甚被嘉獎拜右正言初置龍圖閣待制與杜鎬並命綸久次州縣留意吏事每便殿請對語必移晷或夜中召見多所敷啓俄上奏十事一曰王畿闕輔二曰五等封建三曰復制科四曰崇國學五曰聞曠土六曰脩貢舉

七曰任大臣八曰置平糴九曰益廂軍減禁兵十曰脩
六典令式詞頗深切二年命知貢舉綸上言取士之法
多所規制並納用焉預脩冊府元龜會置官總在京諸
司之務凡百三十司命綸與劉承珪同領其事判鴻臚
寺先是羣臣詔葬公私所費無定式綸言其事定為制
度以三公尚書九列之任謂宜采通禮六典令式比類
沿革著為大典時論稱之進秩右司諫兵部員外郎時
詔禁羣臣匿名上封及非次升殿奏事綸謂忠諫之入

當開獎言路若疎遠之士尤艱請對帝頗嘉之大中祥符元年掌吏部選事方是時祥文薦降歌頌日興綸恐流俗託朝廷嘉瑞事詐為神靈木石之異幻惑愚衆如

少君藥大者上疏極諫

按宋史本傳載綸疏辭不若事畧方是時數語能明上疏之意

今據纂入

是冬封泰山命綸同計度發運事禮成遷戶部郎

中直昭文館待制如故被詔同編裏封祥瑞封禪記會峻待制之秩又兼集賢殿脩撰建議脩釋奠儀頒于天下立常平倉隸司農寺以平民糴皆從之嘗宴餞种放

于龍圖閣詔近臣為序帝覽綸所作稱其有史才三年
擢樞密直學士復領發運之職出知杭州就加左司郎
中屬江湖為患乃立埽岸以易柱石之制雖免水患而
衆頗非其變法胡則時領發運肆縱不檢厚結李浦綸
素惡之通判吳耀卿則之黨也因共捃摭綸過徙知揚
州維揚亦浦則巡內持之益急求改僻郡徙徐州八年
罷學士授左諫議大夫代還復知青州歲饑發公廩以
賑全安甚衆徙鄆州王遵誨為勸農副使誣奏綸謗訕

坐左遷岳州團練副使易和州天禧四年改保靜軍節
度副使以疾求歸故里改太常少卿分司南京五年卒
年六十八綸篤於古學善談名理喜言民政頗近迂濶
事兄維友愛甚厚與交游故舊以信義著稱士子謁見
者必詢其所業訪其志尚隨才誘誨之大中祥符中繼
脩禮文之事綸悉參其議樂於薦士每一卷十數人皆
當時知名士晚節為權倖所排遂不復振善訓子弟雖
至清顯不改其純儉既沒家無餘貲家人於几閣間得

遺戒一篇大率皆誘勸為學天聖中子舜賓獻其文詔
贈左諫議大夫舜賓官太子中書

張去華字信臣開封襄邑人幼勵學敏於屬辭以蔭補
太廟齋郎周世宗平淮南時年十八慨然歎曰兵戰未
息民事不脩非馭國持久之術因著南征賦治民論獻
于行在召試授御史臺主簿屬三院議事不得預坐謂
所親曰簿領之職非壯夫所為即棄官歸鄭州太祖建
隆初始攜文遊京師大為李昉所稱明年舉進士甲科

即拜秘書郎直史館以歲滿不遷上章自訴因言制誥
張澹虛多遜殿中侍御史蘇頌文學膚淺願得校其優
劣太祖命陶穀等考之澹以所對不應問降秩即擢去
華為右補闕朝議薄其躁進以是不遷秩者十六年嘗
得對便殿詢及家世遂訴父仕漢忤權貴因罹重貶宰
相薛居正亦為言之太祖曰漢室不道姦臣擅權此朕
所親見也荆湖平命通判道州去華上言桂管為五嶺
衝要今劉鋹保境固守賴之為扞蔽若大軍先克其城

以趣番禺如踐無人之境且言桂州可取狀代還知磁
乾二州選為益州通判遷起居舍人知鳳翔府從太祖
征太原監隨駕左藏庫就命為京東轉運使歷左司員
外郎禮部郎中太平興國七年為江南轉運使雍熙中
王師討幽州去華督宋州饋運命掌河北轉運事三年
加陝州未行會許王尹京命為開封府判官踰歲就拜
左諫議大夫又令樞密使王顯以輔成之意未幾有廬
州尼道安訟弟婦不實弟婦即徐鉉妻之甥去華故不

為治坐貶安州司馬歲餘召授將作少監知興元府改
晉州遷秘書少監知許州真宗嗣位復拜左諫議大夫
遷給事中知杭州兩浙自錢氏賦民丁錢有死而不免
者去華建議請除之有司以經費所仰固執不許咸平
二年徙蘇州頃之以疾求分司西京景德元年改工部
侍郎致仕三年卒年六十九嘗獻元元論大旨以養民
務穡為急真宗深所嘉賞命以縑素寫其論為十八軸
列置龍圖閣之四壁然不飭邊幅頗為清議所貶以是

不登顯用子師古師顏國子博士師錫殿中丞

師德字尚賢去華十子最器師德舉進士第一除將作
監丞通判耀州遷秘書省著作郎集賢校理判三司都
理欠憑由司建言有逋負官物而被繫本非侵盜若悻
獨貧病無以自償願特蠲之真宗用其言嘗奏事殿中
帝訪以時事條對甚備帝喜其後每遣使輒曰張師德
可用契丹高麗使來多以師德主之天禧初安撫淮南
改判司農寺擢右正言知制誥累拜左諫議大夫師德

孝謹有家法不交權貴時相頗不悅之在西掖九年不遷卒于官子景憲為太中大夫

樂黃目字公禮撫州宜黃人世仕江左李氏父史字子正太平興國五年以現任官舉進士既佐武成軍復賜及第官至職方員外郎判留司御史臺好著述咸平五年盡取其所著書藏秘府黃目淳化三年舉進士補伊闕尉遷大理寺丞知壽安縣咸平中徙知壁州上章言邊事召對拜殿中丞直史館知浚儀縣俄上言請自今

審官院差知州銓曹注縣令候各及三二十人一次引見於御前試時務策一道察言觀行取其才識明於吏治達於教化者充選則官得其人事無不治帝頗嘉其好古歷度支鹽鐵判官遷太常博士京西轉運使大中祥符中使契丹還改工部員外郎廣南西路轉運使就拜起居郎改陝西轉運使陳堯咨知永興多縱恣不法詔黃目察之得實以聞堯咨坐罷黃目入判三司三勾院天禧初馬元方奏黃目職事不舉遂分三勾院以三

人掌之黃目罷任奉朝請踰月拜兵部員外郎知制誥
黃目屬辭淹緩朝議不稱職遷右諫議大夫權知開封
府仁宗升儲拜給事中兼左庶子入內副都知張繼能
嘗以公事請託黃目事敗降左諫議大夫知荆南府復
為給事中徙潭州長沙月給減於荆諸州特詔增之代
還知審官院以疾改知通進銀臺司兼門下封駁事求
外任得知亳州卒年五十六錄其子理國為衛尉寺丞
定國為大理評事

柴成務字寶臣曹州濟陰人乾德中京府拔解太宗素知其名首薦之遂中進士甲科解褐陝州軍事推官改曹單觀察推官遷大理寺丞太平興國中累遷光祿少卿奉使高麗遠俗尚拘忌以月日未利拜恩稽留朝使成務貽書往返開諭大體國人信服淳化二年為京東轉運使會宋州河決成務上言河水所經地肥澱願免其租稅勸民種藝從之召拜司封郎中知制誥與魏庠同知京朝官考課又與庠同知給事中事凡制敕有所

不便者許封駁以聞蜀寇平使峽路安撫改左諫議大夫知河中府時銀夏未寧蒲津當餽輓之衝事皆辦集得脫戶八百家以附籍真宗即位遷給事中知梓州未幾代還又遣知青州旋受詔與錢若水等同脩太宗實錄書成知揚州入判尚書刑部木司小吏倨慢成務怒而笞之吏擊登聞鼓訴寃有詔問狀成務歎曰忝為長官杖一胥而被劾何面目據堂決事邪乃求解職景德初卒年七十一成務有詞學博聞稽古士人重其文雅

然為郡乏廉稱時論惜之成務年六十六始有子授奉
禮郎名貽範後為國子博士

欽定續通志卷三百三十四

欽定四庫全書

欽定續通志卷三百三十五

列傳

宋 三十九

喬維岳

張雍

魏廷式

盧琰

宋搏

凌策

楊覃

陳世卿

李若拙
解

陳知微

上官正

盧斌

周審玉

裴濟

李繼宣

張旦

張煦

張佖

王延德

常延信

張質

楊允恭

秦羲

謝德權

閻日新

靳懷德

喬維岳字伯周陳州南頓人周顯德初登第授太湖主簿遷平輿令開寶中擢為太子中舍知高郵軍通判揚州徙常州金陵平又移昇州改殿中丞太平興國初徙

襄州陳洪進表納疆土以其子文顯為泉州留後朝廷
議擇能臣關掌郡事即起維岳為通判會盜起仙遊莆
田縣百文鎮衆十餘萬攻城城中兵裁三千勢甚危急
監軍何承矩王文寶欲盡屠其民燔府庫而遁維岳挺
然抗議以為朝廷寄以綏遠今惠澤未布盜賊連結反
欲屠城豈詔意哉承矩等因復堅守既而轉運使楊克
讓率福州兵破賊圍遂解詔褒之歸朝為淮南轉運副
使遷右補闕進為使淮河西流三十里曰山陽灣水勢

湍悍運舟多罹覆溺維岳規度開故沙河自末口至淮陰磨盤口凡四十里又建安北至淮滢總五堰運舟所至十經上下其重載者皆卸糧而過舟時壞失糧綱卒緣此為姦潛有侵盜維岳始命剏二斗門于西河第三堰二門相距踰五十步覆以厦屋設縣門積水俟潮平乃泄之建橫橋岸上築土累石以牢其址自是弊盡草而運舟往來無滯矣嘗按部至泗州慮獄法掾誤斷囚至死維岳詰之法掾俯伏且泣曰有母年八十餘今獲

罪則母不能活矣維岳憫之因謂曰他日朝制按問第
云轉運使令處茲罪卒如其言獲免維岳坐贖金百二
十斤罷使職權知楚州遷戶部員外郎代還為度支判
官轉本曹郎中出為兩浙轉運使歷知懷州滄洲會考
課京朝官召還屬真宗以壽王尹京精擇府僚留為開
封府推官或言維岳在淮南決獄不平允左右有知其
事者辯之太宗特加賞異儲闡建兼左諭德轉大常少
卿京府事繁維岳評處詳敏真宗踐祚即命維岳與畢

士安權知開封府拜給事中知審官院維岳陳乞外遷
小州上嘉其靜退特授海州刺史咸平初知蘇州素病
風上以吳中多食魚蟹乃徙壽州卒年七十六贈兵部
侍郎官給其葬六中祥符中錄其孫世昌獻之並賜同
學究出身維岳明習吏事有治劇才

按史史比下有王
陟附傳無事蹟足

錄本
從刪

張雍德州安德縣人治毛氏詩開寶六年中第釋褐東
闕尉太平興國初有薦其材者召歸改將作監丞知南

雄州遷太子右贊善大夫知開封府司錄參軍事俄為
祕書丞充推官京城民王元吉者母劉早寡有姦狀為
姻族所知憂悸成疾又懼元吉告之遂遣侍婢訴元吉
寘堇食中以毒已病將死事下右軍巡按之未得實移
左軍巡推吏受劉賄掠治元吉自誣伏俄而劉死府慮
因元吉始以實對又移付司錄盡捕元推吏稍見誣構
之跡列狀引見詔免死決徙元吉大呼曰府中官吏悉
受我賂反使我受刑乎府不敢決元吉歷陳所受賂主

名又令妻張擊登聞鼓訴之帝召張臨軒顧問盡得其枉狀立遣中使捕元推官吏付御史鞠治雍正坐慮問元吉稱冤戒吏止令鞠其毒母狀致吏訊掠慘暴免所居官雍正初雍復為祕書丞御史臺推直官改鹽鐵推官遷右補闕充判官端拱初轉工部郎中判度支勾院又為鹽鐵判官兼判勾院以本官兼侍御史知雜事出為淮南轉運使淳化初遷為大府少卿加右諫議大夫徙兩浙轉運使入知審刑院充戶部使出知梓州就命為

西川轉運使俄復知梓州蜀州青城民王小波李順作
亂衆至萬人雍訓練士卒得城中兵三千餘人又募彊
勇千餘守城輦綿州金帛以實帑藏遣推官盛梁請兵
于朝未幾益綿邛彭漢州永康軍悉陷于賊順入成都
僭號大蜀王勢甚盛遣其黨楊廣將十萬衆寇劍門相
里貴帥衆十萬圍梓潼雍與監軍盧斌登堞望之賊所
出兵皆老弱疲憊無鎧甲斌笑請開北門擊之雍曰不
可賊或詐見老弱設伏伺我又城中吏民心未定脫為

伏兵所突則墮其姦計言未畢果有卒依敵樓呼嘯與外應和雍亟斬以徇賊大設梯衝火車晝夜鼓譟攻城益急城中大恐雍命發機石碎之火箭雜下賊稍退復治攻具城西北隅雍紿曰軍士趣治裝吾將開東門擊賊陽遣步騎五百臨東門賊升牛頭山瞰城內信然伏精兵萬餘山之東隅以待我雍即召敢死士百輩縋而下盡焚其攻具自午達申殆盡賊以為神凶黨數乘城進戰皆不利一日北風晝晦賊乘風縱火急攻北門雍

與盧斌等領兵據門立矢石間固守不動賊為之少却
長圍八十餘日會王繼恩遣石知顥來援賊始潰去入
奏帝手詔褒美擢雍給事中至道二年改工部侍郎召
歸復知永興軍轉禮部侍郎改刑部充度支使咸平四
年遷鹽鐵使帝以三司事重宜有裁制用王嗣宗代之
拜戶部侍郎復知審刑院出知秦州徙鳳翔府景德初
權知開封府事改兵部侍郎同知審官院車駕朝陵判
留司尚書省出知鄧州大中祥符元年請老以尚書右

丞致仕誥命未至而卒年七十雍性鄙吝蒞事勤恪善
為米鹽苛察以肅下恃其清幹受遇於時益矯厲以取
名譽所至藩鎮宴犒率皆裁節聚公錢為羨餘以輸官
帑集會賓佐糲食而已在三司置簿籍有按前急馬前
急急中急之日頗為時論所誚子太冲官殿中丞

按宋史此

下有董儼傳儼不學無操行用
頗救國位無事蹟足錄今從刪

魏廷式字君憲大名宗城人少明法學太平興國五年
中第釋褐朗州法曹掾知桃源縣遷將作監丞端拱初

改著作佐郎通判潁州淳化二年始命李昌齡判審刑院以廷式明練刑章奏為詳議官屢進對遷太子左贊善大夫時初較廷臣殿最命廷式與樞密都承旨趙鎔李著同勾當三班多所規制超拜主客員外郎判三司都勾院換河南東道判官改戶部員外郎知利州李順為盜就命充陝西至益州路轉運使後入奏事太宗謂曰有事當白中書廷式曰臣三千七百里外乘驛而至以機事上聞願取斷宸衷非為宰相來也即不時召對

問方略稱旨令還任賊平知寧州未至召入判大理寺
至道初乘傳河朔決獄復出知宋潭二州湖南地土衍
沃民喜訟產有根柢巧偽難辯者廷式立裁之吏民咸
服轉吏部員外郎知桂州歷工部郎中真宗即位改刑
部會王繼恩有罪下吏命廷式同按之踰宿而獄具俄
知審官院通進銀臺封駁司拜右諫議大夫知審刑院
出知涇州咸平二年卒年四十九子舜卿禹卿同學究
出身廷式所至以嚴明稱剛果敢言為人主厚遇然性

傾險喜中傷人士君子憚其口而鄙其行

盧琰字錫圭涇州涇川人父浚右諫議大夫琰太平興
國八年進士解褐歷城主簿歷大理評事知安吉縣三
遷太常丞通判并州至道中就加太常博士咸平二年
選為開封府判官會獄空有詔獎之遷工部員外郎為
河北轉運副使時北鄙未寧調發軍儲糧道不絕以職
務修舉召入遷秩刑部復遣之任會城祁州命專董其
役契丹入邊車駕幸澶州琰自定州隨軍至大名即單

騎赴行在召對勞問久之其子士宗時為隰州推官特遷大理寺丞契丹請和琰求歸闕許之以使勞優拜吏部員外郎判三司三勾院命權戶部副使時議東封又權京東轉運使往營頓置加戶部郎中復判三勾院大中祥符二年以本官兼侍御史知雜事數月授三司度支副使祀汾陰歲命判留守司三司加吏部郎中俄拜右諫議大夫知永興軍府再為河北轉運使琰勤吏職所至以幹集聞卒年五十九時琰母八十餘無恙上憫

之以士宗為太常博士特命知懷州又以次子祕書丞
士倫為太常博士給祿終養士倫至工部郎中度支副
使士崇自有傳

宋搏字鵬舉萊州掖人開寶八年得第調補遂寧尉歷
濰州司理參軍改白虎令膳部員外郎鞫礪薦其能遷
右贊善大夫知利豐監徒知藤州改殿中丞通判洪州
召還命提點河北西路刑獄未行改監左藏庫還國子
博士通判西京留守司得對便坐徙江南轉運使就遷

度支員外郎真宗嗣位遷司封員外郎河東轉運使上
言大通監冶鐵盈積可備諸州軍數十年鼓鑄願權罷
採以紓民又請科諸州丁壯為兵以增戎備在任凡十
一年河東接西北境時邊事未息屯師甚廣搏經制漕
運以幹治稱連徙他州郡輒乞留有詔褒飭兩至夏州
界部發居民數詣闕奏事稱旨屢以秩滿請代朝議以
搏善職就加祠部郎中景德四年入判三司勾院踰月
為戶部副使大中祥符初進秩刑部郎中俄使契丹會

疾契丹主以車迎之二年卒年六十六子可法舜元

凌策字子奇宣州涇人幼孤獨厲志好學雍熙二年舉

進士起家廣安軍判官改西川節度推官以彊幹聞淳

化三年就命為光祿寺丞簽書兩使判官代還拜左贊

善大夫通判定州李順之亂川陝選官多憚行

按宋史地理志

川峽分四路陝西別為一路此處陝字應是峽字之訛

策自陳三蒞蜀境諳其民

俗即命知蜀州又以巴西當益之餉道徙綿州加太常

博士還朝命為廣南西路轉運使進屯田員外郎入為

戶部判官遷都官先是嶺南輸香藥以郵置卒萬人分鋪二百員擔抵京師且以煩役為患詔策規制之策請陸運至南安汎舟而北止役卒八百大省轉送之費盧之翰任廣州無廉稱以策有幹名拜職方員外郎直史館命代之廣英路自吉河趣板步二百里當盛夏時瘴起行旅死者十八九策請由英州太源洞伐山開道直抵曲江人以為便代還知青州東封以供億之勤起拜都官郎中入判三司三勾院出知揚州屬江淮歲儉頗

有盜賊以策領淮南東路安撫使駕旋使停進秩司封
王旦言策蒞事和平可寄方面望即以江南轉運使授
之仍詔諭差選之意饒州產金嘗禁商市鬻或有論告
逮繫滿獄策請縱民販市官責其算人甚便之召拜右
諫議大夫集賢殿學士知益州初策登第夢人以六印
加劍上遺之其後往劍外凡六任時以為異策勤吏職
處事精審所至有治迹自蜀代還上頗有意擢用會已
病命知通進銀臺司兼門下封駁事糾察在京刑獄直

宗嘗對王旦言策有才用治蜀敏而有斷旦曰策性淳
質和臨事彊濟上深然之是秋拜給事中權御史中丞
時權察之法弊甚詔與翰林學士李迪知雜御史呂夷
簡同議經制稍寬其舊明年疾甚不能朝謁累遣中使
挾醫存問賜名藥復表求典並尋遷工部侍郎從其請
天禧二年三月卒年六十二錄其子將作監主簿瓊琬
並為奉禮郎

楊覃字申錫漢太尉震之後覃少獻書於錢王俶俶私

署著作佐郎從俶歸朝為禹城尉太平興國八年舉進士擢第授徐州觀察推官改著作佐郎知戎州再遷太常博士使陝西蠲逋負覃本名蟬至是太宗為改焉淳化中轉屯田員外郎同判壽州巡撫使潘慎修上其政績就命知州事時田重進為永興節度選覃與林特同判軍府事重進不法覃事多抗執重進頗不悅形於辭色覃表求徙任不許就轉都官員外郎時討李斷遷調發芻糧覃特皆以急促辦為務覃令鉗手特令即械頸

人用怨嗟改職方員外郎咸平初遷屯田郎中三門發
運使呂蒙正在河南薦其材詔入判三司磨勘憑由理
欠司四年春旱旱上言古之用刑皆避三統之月漢舊
章斷獄報重盡三冬之月又唐太宗凡斷重刑日敕減
膳徹樂今春物方盛時雨尚愆望詔有司死罪未得論
決俟雨降乃復常典仍望自今凡決重刑日依唐故事
以彰至仁之德嘗獻時務策五篇一曰禦戎二曰用兵
三曰為政四曰選賢五曰刑罰文多不載明年權同知

貢舉出為陝西轉運使會邊臣言繼遷死願乘此時深入致討覃建議伐喪非禮且其子尚在當為之備請詔邊臣謹守疆候毋得輕舉時西鄙屯兵調役甚繁副使朱台符務有為而覃務循舊且言邊事不宜更張初寇準知青州台符為通判至是準作相覃意台符憑恃僚舊密以上聞坐不協徙知隨州移唐州景德二年召歸屬河北兵革之後命覃詣澶濱棣德博州巡撫振給之出知潭州王師討宜賊軍須多出長沙詔書褒勞加刑

部郎中大中祥符二年為淮南江浙荆湖制置發運使
改太常少卿直昭文館知廣州覃勤於吏事所至以幹
濟稱南海有蕃舶之利前後牧守或致謗議惟覃以廉
著遠人便之加右諫議大夫四年卒年五十四遣其長
子奉禮郎文友乘傳喪詔本州護柩還其家官給所費
錄其次子敏為揚州司士參軍覃從弟蛻及從子侃傳
後名大雅自有傳

陳世卿字光遠南劍人雍熙二年登進士第解褐衡州

推官再調東州節度推官會李順寇兩川知州張雍以
州兵馬為數部使官分領世卿素善射當城一面親射
中數百人賊寢盛同幕皆謀圖全計世卿正色曰食君
祿當委身報國奈何欲避難為他圖邪亟出白雍曰此
徒皆懦儒存之適足惑衆不若遣出求援雍從之賊既
引去雍表其材就改掌書記歸朝為祕書郎遷太常丞
知新安縣或薦其堪任憲臺即召歸會張鑑出知廣州
表為通判將行加太常士景德初徙知建州真宗知其

材幹授福建轉運使規畫南劍州安仁等銀場歲增課
羨俄代姚鉉為兩浙路轉運使歷祠部員外郎判三司
三勾院大中祥符四年改度支員外郎出為荆湖北路
轉運使屬澧州慈利縣下溪等四州蠻人侵縣境地四
百餘里朝命世卿與閤門祗候史方知澧州劉仁霸同
領兵討之遂還所侵地標正經界取其要領又令納所
掠漢口千餘復置澧州武口等砦以控制之自是平定
還朝屢述溪洞利害真宗器其材復自言願効用於煩

劇乃授世卿祕書少監郡有計口買鹽之制人多不便至即奏除之卒年六十四錄其子南安主簿儼為太祝李若拙字臧用京兆萬年人父光贊貝冀觀察判官若拙初以蔭補太廟齋郎復舉拔萃授大名府戶曹參軍俄又舉進士擢上第授密州防禦推官登賢良方正直言極諫科太祖嘉其敏贍改著作佐郎故事制策中選者除拾遺補闕若拙以恩例不及上書自陳執政惡之出監商州阮治遷太子左贊善大夫太平興國二年知

乾州會李飛雄詐乘驛稱詔使事敗伏法太宗以若拙
與飛雄父若愚連名疑其昆弟即捕繫州獄坐削籍流
海島歲餘起授衛尉寺丞知隴州四年復舊官以政聞
起授監察御史通判泰州御史中丞滕中正薦之召歸
臺頃之改右補闕時諸王出閤若拙獻頌稱旨召見賜
緋魚同勾當河東轉運兼雲應等八州事嘗詣闕言邊
事太宗嘉之又同掌水陸發運司雍熙三年假祕書監
使交州先是黎桓制度踰僭若拙既入境即遣左右戒

以臣禮繇是桓聽命拜詔盡恭燕饗日以奇貨異物列
于前若拙一不留眄取先陷蠻使鄧君辨以歸使還帝
謂其不辱命遷起居舍人充鹽鐵判官淳化二年出為
兩浙轉運使契丹寇邊改職方員外郎徙河北路五年
直昭文館遷主客郎中江南轉運使若拙質狀魁偉尚
氣有幹才然臨事太緩宰相以為言罷使知涇州至道
二年黎桓復侵南鄙又詔若拙充使至則桓復稟命使
還真宗嗣位召見慰問進秩金部郎中召試學士院改

兵部郎中充史館修撰俄知制誥咸平初同知貢舉被疾改右諫議大夫車駕北巡判留司御史臺明年使河朔按邊事知昇貝二州卒年五十八子繹

繹字縱之幼謹愿自修初以父使交趾有勞補太廟齋郎改太常寺太祝舉進士中第除將作監丞累遷尚書屯田員外郎知華州蒲城民李蘊訴人盜其從子亡去繹密刺蘊蘊有陰罪姪覺之懼事暴殺之以滅口遂收蘊致法擢提點河北刑獄權知貝州歲旱繹為酒務市

民薪草溢常數餓者皆以樵採自給得不死官入亦數
倍邊民歲輸防城火牛草十餘萬委積久輒腐敗繹奏
罷之三遷本曹郎中為利州路轉運使河北經費不支
仁宗問誰可任者參知政事薛奎薦繹遂徙河北進刑
部郎中直史館知延州改兵部為江淮制置發運使內
出絹五十萬疋責貿於東南繹曰百姓饑不宜重擾輒
奏罷之甫半年漕課視常歲增五之一遷太常少卿再
知延州繹所至頗稱治自以久官在外意不自得嘗兩

知鳳翔府至是又徙鳳翔尋為右諫議大夫卒

陳知微字希顏高郵人咸平五年進士甲科解褐將作
監丞通判歙州擢為著作佐郎直史館俄充三司戶部
判官奉使契丹遷太常博士判三司都磨勘司再為戶
部判官出為京東轉運副使奏還東平監所侵民田六
百八十家又決古廣濟河通運路罷夾黃河歲減夫役
數萬計遷右司諫徙荆湖南路轉運使召還拜比部員
外郎知制誥淮南饑遣知微巡撫所至按視儲糧察諸

官吏能否使還判吏部銓兼刑部知微詞藻雖無奇采而平雅適用思亦敏速又判司農寺糾察在京刑獄天禧二年加玉清昭應宮判官卒年五十錄其子舜卿為太常寺奉禮郎知微儀狀甚偉沉厚有材幹不務皦察有集三十卷子堯卿大中祥符五年進士及第

上官正字常清開封人少舉三傳後為郾州攝官雍熙中召授殿前承旨屢遣鞠獄還供奉官閤門祇候天雄監軍淳化中轉作坊副使

按隆平集作作坊使

劍門都監李順之

亂分其黨趨劍門時疲兵數百人正奮勵士氣以禦之
會成都監軍宿翰領兵投劍門與正兵合因迎擊大破
賊數千衆斬馘殆盡太宗嘉之超正為六宅使劍州刺
史充劍門部署翰自供奉官擢崇儀使領昭州刺史數
月正被疾復遣還任所授以方略令招撫殘孽慰勉遣
之初川賊甚盛朝議深以棧路為憂正以孤軍力戰挫
賊鋒自是閣道無壅王師得以長驅而入賊衆三百餘
敗歸成都自此沮氣矣後賊既誅餘寇匿山谷恃險結

集剽劫為患正諭以朝廷恩信皆相率出降未幾加峰
州團練使與雷有終並為西川按安使正木彊好凌人
自謂平賊有勞受人主知無所顧忌數面攻兩川官吏
之短象積怨怒多上章訴其不法者太宗謂近臣曰正
婢直而失於謙和恐其不能自全乃賜手札戒諭曰當
以和輯遠民為念正上表謝真宗即位改莊宅使是秋
廣武叛卒劉旰嘯聚數千輩逐都巡檢使韓景祐略漢
蜀邛州懷安永康軍正與鈐轄馬知節領兵趨新漢抵

方井擊敗之斬旰平其黨遷南作坊使咸平初擢拜東
上閤門使勾當軍頭引見司俄權戶部使出知滄州徙
高陽關副都署真拜洺州團練使車駕北巡以為行營
先鋒鈐轄尋知青州會王均叛屬命為峽路都鈐轄移
知梓州又歷滄瀛鎮貝四州高陽關部署求知磁州會
邢州地震民居不安徙正典之移潞州景德中以河北
新經兵革以正知貝州遷洺州防禦使復知滄州移同
州再表引年授左龍武軍大將軍平州防禦使分司西

京尋以本官致仕四年年七十五子璩

盧斌開封人以筆札事晉邸太宗即位補殿直雍熙中

領兵屯霸州會大舉北伐令以五千騎隨曹彬抵岐溝

按宋史本傳作祁滿隆平集作岐滿
考宋史地理志隆平集不悞今據改

時契丹據河王師

乏水斌請以千弩研砮契丹遁去遂移軍夾河既克涿

州令斌以萬人戍守會食盡大兵將還斌因懇言涿州

深在北境外無援兵內無資糧丁籍殘失守之無利今

若還師必須結陣而去以一陣之役比於固守其利百

矣復慮遼人承便剽襲宜為之備彬以為然遂令斌擁
城中老幼並狼山南還易州彬之旋也無復行伍果為
契丹所乘諸將皆以失律被譴斌亦下樞密院問狀太
宗聞其嘗建議棄涿州遂釋不問以為霸州破虜軍緣
遘巡檢端拱中又為永興軍華州巡檢時大賊侯和尚
劉渥劫興平櫟陽斌率兵掩襲且追且鬪至耀州擒斬
並盡以勞改供奉官召還面加獎慰授閤門祇候為梓
遂十二州都巡檢使許便宜從事淳化二年賊任誘等

寇昌合州斌偵知賊在龍水鎮值大雨斌馳馬四十里
騎從數十人遂斬誘等百餘級賊象悉平富順監蠻掠
榮州斌晨夜倍道以赴得州兵千人署隨軍糧料以張
其勢蠻乃遁追至地頭鎮東南八十里樹柵招其酋諭
以朝旨歆血刻石為盟而遣之俄而榮戎資州富順監
賊鈔鄉邑斌擒三百人部送闕下餘悉臨敵斬戮賊王
盡復起榮資斌擊滅之盡縛以獻遷內殿崇班是冬李
順為亂斌即率兵六百抵成都鬪戰連月殺數萬人明

年成都守不守斌還梓州集十州兵赴援知州張雍委以
監護之任會江水汎溢毀子城斌勸諭州民翌日畚鍤
大集自城西大濠中掘塹深丈決西河水注之以環城
二月賊渠相里貴象二十一萬傳城下城中兵裁三千
斌曰軍法倍兵不戰然狂醜烏合非訓練之師即感厲
士伍負土塞南北門為固守之計又突出與賊戰擊刺
三十餘合賊稍却俄復大設機石連弩街車雲梯四面
鼓譟乘城矢石亂下斌與州將隨機設備長圍八十日

會王繼恩令石知顯率兵來援斌出東門迎勞王師賊
不戰而潰斌乘勝追斬及納降二萬餘五月賊數萬圍
閬州斌領千兵赴之斬首五千圍遂解又至蓬州老雅
山賊衆三千為陣拒斌斌擊敗之至城下賊復大集斬
三千級蓬州平斌傳詔安撫蓬閬渠達四州擢授西京
作坊使領誠州刺史斌在川陝六年以孤軍禦寇累立
戰功表求入奏太宗遣使諭之曰俟妖孽盡殄當召汝
既而賊黨集梓縣漢三州境上斌往平之未幾代還太

宗親加勞問拜東上閣門使檢校左僕射加食邑三百戶上言葭萌路出師討賊可直入利州若寇焚棧道劍門之險不足固也請置砦柵從之尋命為銀夏兵馬鈐轄遣與李繼隆等五路出師討李繼遷斌求對懇言不若堅保靈州於內地多積芻糧以師援送苟其至也會兵首尾擊之庶幾無枉費而不失固圍之策矣時業已出師不從其議改授靈環路鈐轄領兵二萬為前鋒令於烏白池與諸軍會斌謂李繼隆曰靈州抵烏白池月

餘方至若自環州橐駝路裁十日程即不俟詔而往與諸將失期不見賊而還俄徙屯寧州以疾召歸勾當軍頭引見司咸平初卒年五十子文質殿中丞

周審玉開封人父勲以親校事唐明宗累立戰功太平興國中至隰州團練使周顯德初審玉蔭補殿直從世宗平瓦橋關甚見親信太祖受禪為供奉官未幾加閤門祇候累遷崇儀洛苑副使西京作坊使雍熙中契丹犯塞潘美屯師定州審玉為監軍嘗與敵戰而先鋒劉

緒陷賊審玉躍馬趣擊拔緒而還以勇敢聞淳化中知
貝州有驍捷卒戍州者三十七人同謀殺審玉劫庫兵
而叛推虞侯趙咸雍為首審玉覺之與轉運使王嗣宗
率兵悉擒其黨以功領順州刺史至道初徙并州鈐轄
咸平初知鳳翔府有桑門乘傳而西以市木為名咸動
府縣審玉曰此有所倚而為也因按詰之盡得其姦狀
械送闕下以目疾代還奉朝請拜章請老得左千牛衛
大將軍

按宋史本傳脫左
字據隆平集增

致仕卒年七十四審玉少長

兵間習知攻守之法子允迪為虞部員外郎

裴濟字仲溥絳州聞喜人唐相耀卿八世孫後徙家河中濟少事晉邸同輩有忤悍者濟屢糾其過失被譖出補太康鎮將太宗即位補殿直為天威軍兵馬監押及平太原征幽薊濟迎謁陪扈令監軍易州契丹攻城不能下以勞遷西頭供奉官太平興國末江表盜起命為巡檢遷崇儀副使召還遷崇儀副使召還遷崇儀使監戍兵於威虜軍塗次鎮州夜有賊騎扣城門大呼曰官

軍至矣州將然之促守吏開關濟遽止之曰此必妄也
及旦果有敵兵遯去太宗嘉之遷西上閤門使定州都
監就加行營鈐轄尋知定州契丹三萬騎來攻濟逆擊
於徐河斬數千級獲牛馬鎧仗甚衆淳化初與周瑩同
判四方館未幾為鎮州行營鈐轄又與李繼隆擊賊於
唐河濟短兵陷陣賊大敗走優詔褒美改四方館使復
知定州徙天雄軍鈐轄遷客省使復知定州至道二年
改內客省使知鎮州立春日出土牛以祭酌奠始畢有

卒挾牛去濟察其舉止知欲為變亟命擒之果有竊發者數十人已劫鄆間矣悉蒐捕腰斬之軍民肅然濟在鎮定凡十五年威績甚著召還知天雄軍咸平初李繼遷叛以濟領順州團練使知靈州兼都部署至州二年謀緝八鎮興屯田之利民甚賴之其年清遠軍陷夏人大集斷饗道孤軍絕援濟刺指血染奏求救甚急兵不至城陷死之帝聞嗟悼特贈鎮江軍節度三子並優進秩濟在諸使中甚有聲望及沒夏人皆惜之子德谷虞

部郎中德基至如京使德豐殿中丞

李繼宣開封浚儀人乾德中補右班殿直裁十七歲命
往陝州捕虎殺二十餘生致二虎一豹以獻太平興國
初掌南作坊使改供奉官出為邠寧慶三州巡檢都監
繼宣本名繼隆與明德皇后兄同姓名至是太宗改焉
召還承受定州路奏事奉詔修長城口平塞威虜靜戎
軍保州又領兵入敵境獲老幼千餘牛畜數百又率兵
扞契丹于乾寧泥姑海口契丹寇靜戎軍從崔彥進過

拒馬河接戰大敗之又為貝州監軍雍熙三年曹彬北
征繼宣從先鋒李繼隆至方城力戰三日大軍繼至遂
克固州進壁涿州東又與敵鬪乘勝攻北門克之又將
五千騎援米信因率勁騎追至新城北大敗之繼宣亦
中流矢大軍還雄州取芻糧遇契丹新城疾戰至暮繼
宣中十創明日復戰繼隆為敵所邀繼宣以所部拔之
且戰且行奪涿河數日乃至涿州及棄州保歧溝關又
戰拒馬上追奔至孤山契丹乃引去留屯滿城俄還貝

州以功超授崇儀使代王繼恩為易州駐泊都監又領騎兵五千戍北平押大陣東偏受田重進節度屯長城口敵至大溝繼宣進滿城敵至定州奪唐河橋重進召繼宣赴援轉鬪入定州敵兵北去重進命將五千騎躡其後抵拒馬河及敵據楊疇繼宣徑掩擊之遂焚廬舍而遁雍熙四年為高陽關行營都監端拱初契丹騎至瀛鎮繼宣率步騎萬人入敵境抵勝務焚聚落獲生口契丹乃引還時易州侯騎不至繼宣於易州平塞軍長

城口威虜靜戎順安軍至高陽為望櫓七所舉烽以候
警急二年為鎮定高陽關三路排陣都監押大陣西偏
與李繼隆部芻糧抵威虜還度徐河為敵追襲繼宣駐
軍與鬪殺獲甚衆又敗契丹於保州西射城追薄西山
淳化三年徙知保州又轉莊宅使築關城浚外濠葺營
舍千五百區造船一百艘入雞距泉以運糧徙定州行
營都監戍深州改高陽關行營都監課軍中勁弩為入
陣之備五年領高州刺史會契丹泛海劫千乘縣繼宣

請於海口置砦以禦之至道三年遷北作坊使俄加南
作坊使出為鎮州行營幹轄契丹寇定州命主無地分
馬敵至懷德橋繼宣領兵三千掩襲之至則契丹已壞
橋繼宣橫木而度追奔五十餘里契丹焚鎮州中渡常
山二橋繼宣領兵趣之契丹保豐隆山砦繼宣伐木治
常山橋契丹聞之大懼拔砦遁走繼宣銳於追襲傳潛
為部署繼宣詣潛請行頗為所抑及召潛屬吏詔繼宣
與高瓊同主軍事逐敵越拒馬河復為鎮州鈐轄受詔

按視緣邊城砦權知威虜軍敵騎至城下屢出兵設伏
斬獲甚衆俄還鎮州咸平四年拜西上閣門使領康州
刺史為前陣鈴轄與秦翰楊延昭楊嗣分屯靜戎威虜
敵至會師于威虜延昭嗣輕騎先赴羊山繼宣與翰分
左右隊各整所部翰全軍亦往繼宣留壁赤虜止以二
騎繼進至則延昭嗣適為敵所乘繼宣即召赤虜之師
與翰師合勢大戰敵走上羊山繼宣逐之環山麓至其
陰繼宣馬連中矢斃凡三易騎進至牟山谷大克捷特

加檢校官及食邑明年徙定州鈐轄扞契丹于唐河會
緣邊都巡檢使楊延昭楊嗣禦敵師敗詔繼宣與內殿
崇班王汀代之望都之敗敵騎剽郡縣繼宣壁徐河契
丹數十隊薄威虜威虜魏能與戰走之久而繼宣始至
又寇靜戎汀請分兵自將襲契丹繼宣拒之雖日出遊
騎偵敵勢屢徙砦而未嘗出戰為能汀所發召還令樞
密院問狀降為如京副使景德初加如京使鎮州鈐轄
契丹乘秋來攻時桑贊病足鄭誠赴定州繼宣獨主鎮

州全師歷屯邢趙及與契丹和命為高陽關鈐轄復為
西上閤門使領康州刺史三年兼知瀛州繼宣罕識字
帝以河間郡事繁命高繼勳代之止為鈐轄大中祥符
初徙鎮定兩路鈐轄進秩東上閤門使召還改鄆州部
署加四方館使以疾授西京水南都巡檢使卒年六十
四子守忠

張旦趙州人勇敢善射以經學中第至國子博士淳化
中知陵州時李順搆亂連下城邑賊黨數萬攻陵州旦

修完戰具置鹿角砦驅市人進戰大敗之殺五千餘人
獲器械萬計特遷水部員外郎賜緋魚由是知名數月
西川招安使上官正言雅州蠻過蠻蠻鎮撫須得其人
張旦前守陵州劍外伏其威名望改授諸司使令知州
事帝以省郎之重不欲換他職乃授刑部員外郎賜金
紫乘傳之任真宗即位遷兵部員外郎改尚食使知德
清軍景德中契丹入寇陷軍壁旦與其子利涉率衆奮
擊並戰沒帝聞之驚悼特贈左衛大將軍深州團練使

利涉崇儀副使錄其四子官時有上封事者言朝廷宜優加恩典以勸忠臣詔以恤旦事告諭天下

張煦字輔暘開封人開寶末補府中牙職雍熙二年為殿前承旨遷殿直歙州監軍免人黃行達弟坐法抵死行達誣州將故入其罪詔煦鞠之即日決遣還擢供奉官閤門祗候又改內殿崇班鎮定邢趙山西土門路都巡檢使契丹騎兵剽境上煦以所部斬首數十走之代還拜供備庫副使權知環州改苛嵐軍使又知保安軍

咸平中王均亂蜀以煦為綿漢劍門路都巡檢使又與雷有終進攻成都煦主東砦焚其郭及樓堞均突圍而遁賊平以功就遷正使益州都監提總本路諸軍事夏人寇邊改涇原儀渭都鈐轄又為邠寧環慶路鈐轄兼巡檢安撫都監累躡寇入賊中掩殺甚衆有詔嘉獎會遣王超張凝秦翰援靈武命煦為西路行營都監至鎮戎聞靈武已陷復還本任與張凝入西夏境夏人七百餘邀戰煦擊殺甚衆清遠故城有酋長請以甲騎三萬

來降煦與凝曰此詐也亟嚴兵以待之果然凝按部歸
環州道為敵所邀煦聞之領所部銳兵自慶州赴之一
夕與凝會射殺其大將與凝同還景德元年加領賀州
刺史復為涇原儀渭鎮戎軍鈐轄再知環州四年宜州
戍卒陳進反命副曹利用為廣東西路安撫使盧均僭
號南平王圍象州煦以兵會利用斬之初與利用同署
紙人持百枚備給立功將士及破賊利用在前軍無所
給煦在後而所給過半真宗謂其太過賊平改如京使

知懷州擢河陽鈐轄遷文思使知曹州會江淮災歉以
煦為江南西路安撫都監俄還濟陰加北作坊使又徙
滄州就轉官北使領康州刺史大中祥符九年加領昭
州團練使知鄜州未幾復知滄州天禧三年拜西上閤
門使徙并代鈐轄以老疾求近郡得知磁州卒年七十
三煦明術數善相宅時稱其妙

張佖字仲雅本燕人後徙華州渭南初名志言後改焉
父昉殿中少監佖少有志節始用蔭補殿前承旨以習

儒業獻文求試換國子監丞遷著作佐郎監三白渠知
涇陽縣端拱初為太子右贊善大夫曹州民有被誣殺
人者詔往按之發掘姦伏寃人得雪尋通判忻州遷殿
中丞兼御河督運至道中通判陝州再部送芻糧赴靈
武就改國子博士咸平初擢為陝西轉運副使賜緋魚
至延安遇夏人入寇親督兵擊敗之三年徙西川轉運
副使時詔討王均以餽餉之勞遷虞部員外郎賊平以
佶為利州路轉運使有薦其武幹者召還授如京使涇

原鈐轄兼知鎮戎軍徙麟府路鈐轄夏人來寇信率兵
與戰親射殺酋帥俘獲甚衆景德中徙益州鈐轄加宜
州刺史遷文思使信御軍撫民甚有威惠蜀人久猶懷
之大中祥符四年車駕視汾陰以為西京舊城巡檢鈐
轄會秦州李濬暴卒帝語近臣曰天水邊要宜速得人
馬知節稱信可任帝然之遂改驥驥使就命知秦州至
州置四門砦開拓疆境邊部頗怨又臨渭置采木場戎
人不之爭移帳而去信不甚存撫亦不奏加賚賜邊人

追悔引象劫掠佖深入掩擊敗走之議者又欲加恩宗
哥立遵等族以扼平夏佖請拒絕之徙邠寧路鈐轄天
禧初召為契丹國信副使再任邠寧兼知邠州遷宮苑
使擢拜西上閤門使復為涇原鈐轄卒年六十九佖涉
獵書史好吟詠勇敢善射有方略其總戎護塞以威名
自任子宗象

王延德開封東明人父溫晉末契丹內侵溫率鄉豪捍
敵境內里人德之宣祖掌畿甸兵與溫厚善延德方總

角宣祖愛其謹重召置左右太宗尹京署為親校太平
興國初授御厨正使加尚食使領薊州刺史兼掌武德
司改皇城使掌御輦院左藏庫延德所領凡五印因對
懇讓遂罷左藏御厨八年兼充親王諸宮使延德素謹
慎以舊恩每延訪外事端拱初領本州團練使淳化中
當進秩延德與王繼恩杜彥鈞使額已極特置昭宣使
以延德等為之至道二年加領平州防禦使真宗嗣位
改領懷州咸平初出知華州占謝日面請罷昭宣使從

之帝幸大名為東京舊城都巡檢使明年以風痺請告
遣還本郡是冬卒年六十四贈邕州觀察使延德所至
好撰集近事先是詔史官修太祖太宗實錄多以國初
事訪延德又上太宗南宮事迹子應昌莊宅使端州團
練使

常延信并州平晉人祖思仕周歷昭義歸德平盧三鎮
節度延信皆補牙職領和州刺史思卒入為六宅使領
郡如故太祖即位改領平州坐與妻族相訟左授右監

門衛副率出為潼關監軍延信以開路巖險奏易道路及填禁院役工四十餘萬又監通許鎮兵改梓遂十二

州都巡檢使時亡命卒多聚山林為寇延信領徒捕殺

三百餘人歷全郡六州都巡檢使就充羊狀六砦都鈴

轄

按宋史地理志全州清湘縣注云有香煙祿塘長烏羊狀硤石唐石獲源七砦又按方輿紀要羊狀作羊

狀

遷右衛副率會誠州蠻歸款命延信馳入溪洞索其

要領又逐蠻直趣古鎮過西延大木諸洞蠻人懼伏淳

化中歷襄鄧宗曹等州都巡檢使改左監門衛將軍屢

部徒修護河防改左領軍左屯衛二將軍充西京水南
都巡檢使有盜掠彭婆鎮及甲馬營延信馳以往悉擒
之咸平中歷太康鞏縣二監軍景德二年卒年六十四

按宋史此下有程德玄王延德魏震三傳宋史列傳第
六十八有兩王延德卷首之王延德開封人此為大名
人考宋會要雍熙中供奉官于延德使高昌此王延德
亦以供奉官使高昌或即于延德之訛也與德玄震俱
無事蹟足錄
今並從刪

張質字守朴博州高唐人少孤養于兄贊贊為樞密院
典謁質因得隸兵房頗為趙普曹彬所知太宗征河東

還駐鎮陽彬方典樞務一夕議調發屯兵時軍載簿領阻留在道質潛計兵數部分軍馬及得兵籍較之悉無差謬淳化中累遷本房副都承旨咸平初授左監門衛將軍樞密副都承旨景德三年為左屯衛大將軍歷右神武軍右衛二大將軍大中祥符七年轉都承旨在樞要僅五十年練習事程精敏端慤未嘗有過舊本院吏罕有遷至都承旨者帝素知質廉謹故以授之嘗召問五代以降洎國初軍籍更易之制且命條具利害質纂

兵要以進帝覽而稱善天禧元年卒年七十四錄其子大理評事純為衛尉寺丞孫思道為三班奉職

楊允恭漢州綿竹人家豪富少倜儻任俠乾德中王師平蜀羣盜竊發允恭裁弱冠率鄉里子弟砮于清泉鄉為賊所獲將殺之允恭曰苟活我當助爾賊素聞其豪宗乃釋之陰結賊帥子伺賊將害其子以告因遁去內客省使丁德裕討賊至州允恭以策干之署綿漢招收巡檢賊平補殿前承旨太平興國中以殿直掌廣州市

舶自南漢之後海賊子孫相襲大者及數百人州縣苦之允恭因部運入奏其事太宗即命為廣連都巡檢使又以海鹽盜入嶺北民犯者衆請建大庾縣為軍官輦鹽市之詔建為南安軍自是冒禁者少賊有葉氏者衆五百餘往來海上允恭集水軍造輕舫掩襲其首斬之餘黨走匿山谷允恭代木開道殲焉賊寇每遇風濤則避止洲島間允恭領衆涉海捕之殆盡賊皆望風奔潰又抵漳泉賊所止處盡奪先所劫男女六十餘口還其

家轉供奉官詔歸改內殿崇班時緣江多賊命督江南
水運因捕寇黨行及臨江軍擇驍卒拏輕舟伺下江賊
所止夜發軍城遇賊百餘拒敵悉梟其首又趣通州境
上躡海賊賊係象舟張幕發勁弩短礮允恭兵刃所向
多為幕所縈礮中允恭左肩流血及袖容色彌壯徐遣
善泅者以繩連鐵鈎散擲之壞其幕士卒爭進賊赴水
死者大半擒數百人自是江路無剽掠之患以功轉洛
苑副使江淮兩浙都大發運擘畫茶鹽捕賊事先是三

路轉運使各領其職或庫廩多積而軍士舟楫不給雖以官錢雇丁男挽舟土人憚其役以是歲上供米不過三百萬允恭盡籍三路舟卒與所運物數令諸州擇牙吏悉集允恭乃辦數授之江浙所運止于淮泗由淮泗諭京師行之一歲上供者六百萬淳化五年轉西京作坊使初產茶之地民輸賦者悉計其直官售之精麤不校咸輸權務商人弗肯售久即焚之允恭曰竭民利而取之積腐而棄之非善計也至道初劉式建議請廢緣

江諸榷務

按宋史本傳作劉氏建議請廢緣江榷務考宋史食貨志淳化五年監察御史薛映秘書

丞劉式請罷緣江諸榷務至道初式

猶固執前議據此氏為式之訛今改許商人過江聽私

貨鬻允恭以為諸州新陳相掾兩河諸州風土各有所

宜非雜以數品即商人少利請依舊河北置務均色號

以年次給之事下三司鹽鐵使陳恕等以允恭議為是

詔從之即命允恭為發運使始改擘畫為制置巢廬江

二縣舊隸廬州道遠多寇民輸勞費允恭請以二縣建

軍詔許之以無為額

按宋史地理志及元豐九域志以廬州巢縣無為鎮建為軍以

巢廬江二縣屬之淮南十八州軍其九禁鹽地則上下在太平興國三年

其直民利商鹽之賤故販者益衆至有持兵器往來為盜者允恭以為行法宜一即奏請悉禁而官遣吏主之事下三司三司言其不可允恭再三為請太宗始從之是歲收利巨萬允恭與王子與秦義同主茶鹽之任多作條制遂變新法真宗即位改西京左藏庫使又言川峽鐵錢之弊曰臣在先朝嘗陳其事願變法以革其弊先帝方議行之會賊順叛擾而止今陛下繼成先烈可

遂建其法使民不失所且饒信之銅積數千萬若遣運于荆達于蜀蜀素多銅俾夔益遂各置監鼓錢歲用均給不十年悉用銅錢矣議雖未用然自是吏卒奉給始改用十鐵錢易銅錢之一俄知通利軍兼黃御河發運使會議減西鄙屯兵以息轉餉召允恭與崇儀副使竇神寶閤門祗候李允則馳往經度圖上郡縣山川之形勝允恭因建議曰自環州入積石抵靈武七日程芻粟之運其策有三然以人以驢其費頗煩而所載數少莫

若用諸葛亮木牛之制以小卒發卒分鋪運之每一車
四人挽之旁設兵衛加戈刃于其上寇至則聚車於中
合士卒之力禦寇于外尋為議者所沮而止復遣之任
又議江淮鹽鐵使陳恕力爭詔從允恭之議加領康州
刺史咸平初以北邊賣馬未有定直命允恭主平其估
乃置估馬司鑄印以為常制王均之亂帝慮南方有聚
寇命允恭為荆湖江浙都巡檢使二年以疾聞遣其子
大理評事可乘傳侍疾卒于昇州年五十六賜其次子

告同學究出身允恭有膽幹能以方畧捕賊王小波之
亂李順之兄自榮據綿竹土人多被脅從允恭兄允升
弟允元率鄉里子弟併力破之又為王師鄉導執自榮
詣劍門以獻王繼恩表其事詔賜允升學究出身授本
縣令允元什邡令明年召赴闕授允升右贊善大夫允
元大理評事可咸平元年進士喜屬文有吏幹累召試
歷都官員外郎告虞部員外郎

秦義字致堯江寧人世仕江左父承裕建州監軍使知

州事李煜歸朝承裕遣義詣闕上符印太祖召見悅其
趨對詳謹補殿直令督廣濟漕船太平興國中有南唐
軍校馬光璉等亡命荆楚結徒為盜義受詔縛光璉以
獻太宗壯之改西頭供奉官淳化中又督洛南採銅雷
有終稱其有心計遣監興國軍茶務會楊允恭改茶鹽
法薦義掌真州榷務尋提點淮南西路茶鹽得羨餘十
餘萬遂與允恭同為江淮制置掇授閤門祇候兼制置
榷稅咸平初淮南榷鹽二歲增錢八十三萬餘貫改內

殿崇班又兼制置荆湖路江南羣盜久為民患義討捕

皆盡四年領發運使事

按長編及文獻通考載太宗至道三年即罷發運使真宗咸平

四年加都大發運事兼以淮南轉運使領之而不立使名據此則咸平中未嘗置發運使義特無領其事耳

改供備庫副使獻議增權貼歲十八萬緡所增既多尤

為刻下會歲旱詔罷之景德初遷供備庫使知江陵府

坐舉官不如狀削秩大中祥符初起授供備庫副使明

年廣州言澄海兵嘗捕宜賊頗希恩桀驚軍中不能制

部送闕下帝以遠方大鎮宜得材幹之臣鎮撫之宰相

歷言數人皆不稱旨帝曰秦義可當此任復授供備庫使充廣州鈐轄歷東染院使知蘇州改崇儀使提舉在京諸司庫務因對求典藩郡遷內園使知泉州天禧四年代還道病卒年六十四義知書好為詩喜賓客頗有士風歷財賁之任凡十餘年精勤練習號為稱職

謝德權字士衡福州人父文節初仕王氏後入南唐以驍勇聞守鄂州拒王師戰沒德權以父死事李煜署莊宅副使歸朝詣登聞檢院自薦補殿前承旨遷殿直陝

西巡檢改右侍禁咸陽浮橋壞轉運使宋大初命德權
規畫乃築土實岸聚石為倉用河中鐵牛之制纜以竹
索繇是無患咸平二年宜州溪蠻叛命陳堯叟往經度
之德權預共行以單騎入蠻境諭以朝旨象咸聽命堯
叟以聞加閣門祇候廣韶英雄連賀六州都巡檢使代
歸提點京城倉草場廢積多患下濕德權累覽為臺以
藉之遂無敗腐京城衙巷狹隘命德權廣之既受詔則
先撤貴要邸舍會有訟執政與許州民陰搆西夏為叛

者詔溫仲舒謝泌鞫問令德權監之既而按驗無狀翌日對便殿具奏其妄泌獨曰追攝大臣獄狀乃具德權曰泌欲陷大臣邪若使大臣無罪受辱則人君何以使臣臣下何以事君仲舒曰德權所奏甚善帝乃可之六年命城新樂縣遭供奉官又命浚北平砦濠葺浦陰城一日遽承傳詣闕求對且言邊民多挈族入城居止前歲契丹入塞傳潛閉壘自固康保裔被擒王師未有勝捷臣以為今歲契丹必侵內地令邊兵聚屯一處尤非

便利願速分戍鎮定高陽三路天雄城壘闊遠請急詔
威之仍葺澶州城北治德清軍城暫以為豫備臣竇慮
蒲陰工作未訖敵必暴至帝慰遣之既而契丹果圍蒲
陰及聞有詔修河北行宮德權又驛奏請車駕毋渡河
帝至澶州德權單馬間道赴行在未幾遷內殿崇班提
轄三司衙司德權為設條制均其差使有大將隸內侍
主藏內侍為奏留規免煩重之役德權攜奏白上極言
僥倖帝稱其有守又命提總京城四排岸領護汴河兼

督輦運前是歲役浚河夫三十萬但挑沙擁岸吐河流
汎濫中流復淤德權湏以沙盡至土為垠棄沙隄外又
為大錐以試築隄之虛實植樹數十萬以固岸建議廢
京師鑄錢監徙西窪務于河陰大省勞費改崇儀副使
兼領東西八作司先時每營造患工少至終歲不成德
權按其役皆尅日而就大中祥符元年議東封命與劉
承珪戚綸同計度發運遷供備庫使預修玉清昭應宮
時累徙民舍以廣宮地劉承珪議掘地及丈加築以壯

基址德權患其勞役過甚日與忿爭不能奪遂求罷復領京城倉草場三年詔改西染院使出知泗州至任踰月卒年五十八以其子平為定遠主簿德權清苦幹事好興功利多所經畫見官吏徇私者必面斥之所至整肅然喜采察纖微以聞于上朝論惡之

閻日新宿州臨渙人少為本州牙職補三司使役吏淳化中選隸壽王府主郎中記簿真宗即位擢為供奉官提點雄霸靜戎軍權場咸平元年遷內殿崇班永興軍

駐泊都監徙劍門關兼知劍門縣就加供備庫副使慶
州都監景德初命管勾邠寧環州駐泊兵馬時部署張
凝屢入邈界焚族帳日新皆提兵應援俄知涇州未幾
移慶州上言伊錫三門等族恃險隘桀黠難制請開古
川道東至樂業鎮西出府城從之就轉供備庫使知環
州兼邠寧環慶路鈐轄緣邊都巡檢使安撫都監俄換
涇原儀渭路二年遷如京使領萬州刺史帝朝陵東封
皆命為行宮使大中祥符初改文思使日新起胥吏好

云為以進取嘗上言羣臣子弟以蔭得官往往未童齔以受奉望自今年二十以上乃給廩又京城百官早朝而學士丞郎舍人以上導從呵止太盛難於趨避望令裁減又屢請對多所建白且自陳筋力尚壯願正授刺郡守邇城以効用俄真拜坊州刺史知渭州兼涇原路駐泊鈐轄將祀汾陰故改知同州事儼信頓即日新所部車駕至迎謁獻方物勞問久之遂從祀睢帝賜以襲衣金帶還過新市鎮又設綵樓樂伎以迎駕明年徙知

徐州代還以足疾改又領軍衛大將軍昭州團練使知
單州疾益甚許還京師天禧初卒年六十八

靳懷德博州高唐人祖昌範殿中丞父隱禹城令懷德
太平興國中明法解褐廣安軍判官秩滿授鴻臚寺丞
歷著作佐郎太子左贊善大夫通判相州改殿中丞通
判廣州遷國子博士通判滄州歷虞部累遷比部員外
郎又通判莫州知德州咸平中契丹入侵懷德固守城
壁又轉運使劉通言其善政詔褒之徙知密州會留後

孔守正之鎮代還鹽鐵使陳恕判官王濟薦其武幹換
如京使歷知邛州懷德本名湘素遊寇準之門準父名
湘景德中準方為相懷德乃改名焉俄知滄州大中祥
符初召還復遣之任吏民詣轉運使李士衡借留懷德
士衡以聞未幾遷文思使三年秋以江左旱歉命為洪
虔十州安撫都監未至任改知曹州明年春遷為益州
鈐轄加領長州刺史懷德歷官以強幹稱然酗酒多失
將行別詔戒勗真宗又面諭之就遷北作坊使在劍外

軍民甚畏愛之復以善職入拜西上閤門使改領昭州
刺史知澶州是州居水陸之要懷德悉心撫治頗著政
績使車往復多稱譽焉又知陝州踰年歸闕而卒時天
禧元年年七十三

欽定續通志卷三百三十五